

Or da la fototeca dal DRG

Bun di bun onn

La squadra dal DRG As giavischa in bun e ventiraivel 2010 ed As preschenta quest onn – en connex cun il giubileum da 125 onns Societad Retorumantscha (SRR) – intginas delicatessas da la fototeca. La SRR, ch'è la societad rumantscha la pli veglia cun l'intent da promover lingua e cultura rumantscha, è l'uniun purtadra da l'Institut dal DRG.

L'incumbensa centrala da l'Institut è quella da rediger il Dicziunari Rumantsch Grischun. El posseda dentant er bleras fotografias, las qualas pon vegnir contempladas e cumpradas al lieu. Ellas èn vegnidas fatgas da differents fotografs renumads, sco per exempel da Paul Scheuermeier (1888–1973), da Walram Derichsweiler (1872–1936), da Christian Meisser (1863–1929), da Willy Zeller (1900–1978), da Christoph Simonett (1906–1981), dad Alfons Maissen (1905–2003) etc. ma er da main enconuschentas persunas. Pir dacurt ha l'Institut cumprà in album cun passa 300 fotografias dal temp da l'occupaziun dals cunfins durant l'emprima guerra mundiala. Actualmain dumbra la fototeca dal DRG passa 25'000 fotografias ch'èn er vegnidas digitalisadas.

Mintg'emna – mintgamai il venderdi – vegnin nus a publitgar ina u pliras fotografias veglias d'ina vischnanca rumantscha u anteriuramain rumantscha; 52 emnas na tanschan dentant betg per mussar tut las vischnancas. Forsa che Vus enconuschais ina u l'autra fotografia e schizunt er differents chasas che la fotografia mussa. Vus pudais cumparegliar cun il maletg dal vitg dad oz e pudais forsa constatar che tut è sa midà. Tgisà! Las fotografias che vegnan preschentadas, dentant er anc ulteriuras, sa chattan en l'Institut dal Dicziunari Rumantsch Grischun (IDRG) a Cuira. Sche Vus vulais ina giada guardar fotografias veglias da vischnancas grischunas u sche Vus As interessais per fotografias che mussan usits, guaffens u auters objects dal territori grischun, ans contactai per fixar in termin. Nus ans legrain d'As pudair mussar nossa fototeca e cumenzain noss viadi sisum la Surselva, numnadamain a **Tschamut**.



Tschamut 1918

FOTOGRAFIA: C. MEISSER

Institut dal DRG, Ringstr. 34, 7000 Cuira
telefon 081 284 66 42, e-mail: info@drg.ch